

重修兩淮鹽法志

兩淮鹽法志卷六十一

轉運門

緝私

道光十二年四月鹽政陶澍江西巡撫吳邦慶會奏竊照江西南昌等十府爲淮綱引地歲額應銷二十七萬七千餘引頻年滯銷日甚實由福建浙江廣東三省接壤之區鄰私侵灌而粵私爲患尤甚蓋緣粵省地居贛州府之上游贛州一廳八縣例食粵鹽查雄贛埠之鹽行銷贛縣由西河而至郡城西關潮橋埠之鹽則行銷興國雩都會昌長甯等縣東江埠之鹽則行銷定南信豐

龍南安遠等廳縣本自各分疆界其地又均在贛縣之
上游其鹽本不應行至贛縣乃潮橋東江二埠借官隱
私亦由東河而至郡城東關蔓延於贛縣各鄉並聚於
攸鎮侵越淮界在雄贛埠應銷之贛州引地甘爲東江
潮橋二埠侵銷者皆以淮綱爲壑其鹽同集於攸鎮以
致淮界愈促淮鹽愈滯伏思抽稅旣不可行緝私自不
容緩不扼其要無以絕來源不絕其弊無以塞去路稽
查周而後鄰私斂蹤賞罰明而後官兵振作見當竭力
整頓之際自當因時制宜因地變通庶可收實效而有
起色茲據原任贛州府知府陳煦周歷吉安贛州各處

逐一查勘悉心推求相機定擬章程稟經鹽道余正煥兼署藩司劉重麟會同條議具詳前來臣等詳加考核所議實皆允當

一萬安縣良口市宜添卡堵緝也查萬安毗連贛縣其所轄之良口市在萬安上游百餘里其距萬贛兩縣分界之水西阮則僅止里許實爲粵私入淮門戶應請增設大卡派委文武各員帶兵二百名駐劄該處以資控制查萬安原設之觀瀾羅塘兩卡均派遊擊都司各帶兵五十名近因梟船在良口市以下萬安城以上停泊私售擬將此二卡官兵移駐良口市其吉安府城外原

委該營參將帶兵一百名無關緊要應行裁撤另由額標各營派委守備或千總各一員兵丁各五十名並委文職丞倅一員巡役二十名均駐良口市會同嚴密查拏至良口市以下水陸各路由良口市委員內輪流梭織巡邏以杜販私繞道之弊足資兼顧其萬安縣城外原設芙蓉潮陽二卡仍循其舊以防良口市之疏漏如此一轉移間兵不加多布置更爲周密矣

一龍泉縣之湯村塘宜增官卡也查湯村塘爲攸鎮私鹽挑運至龍泉永新安福永甯蓮花廳必由之路原設卡商一名巡丁八名實形單薄請添派守備或千總一

員兵二十名巡役十名駐劄湯村卡督率商巡堵緝
一泰和縣之白羊泗宜添兵役也查粵私由興國州挑
運至泰和廬陵等縣售賣勢須經過白羊泗水見阮浪
川岡東門嶺四處而白羊泗尤爲緊要該處見設有卡
相距水見阮浪川岡東門嶺不遠原可責令兼巡惟原
派汎弁一員兵丁二十五名卡商一名巡役二十名分
路查拏未免顧此失彼應請酌委守備或千總一員添
兵二十五名並派佐雜一員巡役十名會同駐卡隨時
督率商巡兵役周歷巡緝不使株守一處以防偷越
一贛縣東河上游茅店地方宜設卡以防透漏也查潮

橋東江二埠私船由東河茅店至磨角過贛郡東關蔓延贛州並聚於攸鎮以致雄贛埠與淮界同受其害前於磨角設卡堵截旋因私販改由白澗灘下船又改於白澗灘設卡磨角一處仍派贛縣縣丞稽查至道光元年粵省奏明各歸本界設卡遂將磨角白澗灘各卡裁撤伏思雄贛與潮橋東江二埠雖皆係粵鹽然各有應銷地方贛縣官商於贛州本界設卡並非越界二埠之鹽既不准其侵占贛縣方能清其源以截其流應請於茅店設卡酌派守備或千總一員外委一員帶兵四十名水陸兩路周流巡緝則潮橋東江私鹽自不能越茅

店而至下游之贛縣庶各守各界雄贛埠與淮界均受其益至一切經費應令雄贛埠與淮商均派以昭公允一雄贛埠應銷粵鹽運贛州西關宜驗明註冊上倉也查贛州境內分爲愛敬長興大有四會章水雲泉六鄉每年額銷雄贛埠粵鹽二萬五千八十餘包每包一百五十斤共計三百七十六萬二千餘斤此外卽有融銷亦不過倍於原額乃查章水雲泉二鄉之攸鎮大湖江等處逼近淮界開設之子店熬煎每日約可出鹽八九萬斤每年約可其出鹽三千餘萬斤逾於通縣歲額八九倍影射弊混不可勝言究之粵省亦銷滯引積是有

損於淮無益於粵歷來拏獲私販無非買自攸鎮大湖江兩處皆有舊案可查應責成贛南道將粵省雄贛埠運到鹽包於過關時點驗註冊飭令上倉其轉發各鄉並攸鎮大湖江等處亦令報數點驗註冊然後放行一面將每月到鹽若干分運贛縣各鄉及攸鎮大湖江各若干造冊移送鹽道轉請咨查粵省是否與派撥鹽數相符分別核辦庶贛商不敢任意夾帶於粵省官引毫無格礙可杜藉官行私侵占淮綱之弊

一嚴定功過賞罰以示勸懲也查各處鄰私如果卡員認真查拏無私不獲各州縣切實審辦有犯必懲根究

私鹽來歷嚴懲鄰店之行私窩藏之囤戶則梟賊何致肆行無忌皆由粵引各州縣徇私坐視准引各州縣姑息養奸卡巡員弁復坐糜經費甚至兵役勾串賄庇請嗣後每季查明各州縣銷數比較往年能有起色或獲私較多將各員弁量予記功儻銷數無起色或獲私較少將各員弁記過俟年終核明通年各屬實在溢銷缺銷分別將各卡員弁據實咨部分別議敘議處其地方官功過相抵者應毋庸議記功多者請與議敘記過多者酌加查參如有任聽兵役勾串賄庇及地方官承審鹽案仍屬含糊輕縱者專案參究總期賞罰必信庶勤

能益加奮勉玩怠共知儆惕則梟販潛蹤鄰私斂跡可
期日漸暢銷矣五月奉

硃批該部議奏欽此嗣經部議准

謹按以上西岸籌堵粵私

道光十二年十二月鹽政陶澍江西巡撫周之琦會奏查
饒州府行銷淮鹽七縣與浙引界連水陸交通最易侵
灌向於各要隘設卡堵截不爲不周而私總未淨或由
駐卡員弁地方文武怠忽因循或因地方情形今昔不
同此外並有行銷浙鹽之廣信府屬各縣運漕赴省帶
私侵越以致私充更甚淮引愈滯見當竭力整頓之際

自當因時制宜量爲變通庶可以收實效據原任贛州府知府陳煦會同饒州知府方傳穆周歷饒州廣信各處逐一查勘擬定章程稟經鹽法道余正煥前任臬司劉重麟前任藩司鍾祥會同條議具詳前來臣等詳加考核所議實皆允當

一萬安縣石港卡應估修巡船以備堵截也查石港卡在安仁上游十里爲貴溪縣浙私侵入之源原設巡船一隻向係輪委饒州府丞倅帶巡役二十名由九江鎮派委都司一員帶兵四十名卡商一名巡丁十名水手八名巡緝惟巡船見俱朽壞不堪駕駛應卽修整備用

至丞倅本任各有應辦事宜不能常川駐緝應由省改委勸幹佐雜一員仍帶巡役二十名水手八名其武職亦改由臣周之琦揀派一員帶兵四十名會駐卡所按半年更換卡役無許缺額輪班分駕巡船自石港至藍橋一帶河道往來梭織巡查毋許私船偷越其設卡商巡丁一併裁汰以節糜費

一安仁縣藍橋水卡與鄧家埠北倉陸卡應行裁併以專責成並飭建卡房以備棲止也查藍橋卡坐落安仁城外石港之下相隔僅十里向委該縣縣丞帶領鹽快十名汛兵十名巡緝惟鄧家埠卡係縣丞分駐汎地原

設鹽快八名本有緝私之責復委該縣丞往藍橋卡緝私相隔四十里勢難兼顧又北倉卡在縣東北三十里向係安仁汛把總帶兵十名巡緝該處係由貴溪縣黎田地方至萬年餘十二縣必由要路原設兵丁單弱又無卡房可以棲止應將藍橋卡裁撤飭令該縣丞帶領裁去藍橋卡原設鹽快十名並鄧家埠原設鹽快八名卽在分駐汛地卡所緝私以專責成其藍橋卡裁兵十名並北倉卡共二十名飭建卡房責令該把總常川駐緝以收實效

一安仁縣長塘陸卡應復原設兵額以期得力也查長

塘卡在縣城東南四十里與貴溪鴈潭地方相近陸路
浙私侵越淮界之咽喉私販由此前赴東鄉進賢等縣
俱係數十成羣原委鄧家埠千總帶兵三十名巡緝嗣
於道光八年裁兵二十名僅有十名殊形單弱應復原
額以資堵禦

一德興縣香屯卡宜分路梭巡以免透漏也查香屯距
安徽婺源小港五里爲饒郡南河浙私侵入之源最爲
扼要水漲之時私鹽由小港裝載大船連檣直下水涸
之時有自香屯以上與小港相連之江村坂陸路挑赴
浮梁樂平二縣者有繞過香屯後山至河西五家垣者

有由距小港半里之馬石至河東楊家溪下船者水陸路路可通向於香屯卡專委該縣縣丞帶同鹽快十名由九江鎮派武職大員帶同委弁一員兵丁五十名巡緝該縣丞本任有應辦公事不能常駐卡所弁兵又株守一處以致緝私不能得力嗣後應由省改委勤幹佐貳一員帶同巡役十名其武職亦由臣周之琦揀派一員帶兵五十名並令會同文員督兵三十名駐卡堵緝其餘二十名卽令委弁在馬石江村坂五家垣楊家溪各處確探梟賊蹤迹分路梭巡且聲勢聯絡卽遇大夥私販亦可併力截拏派文武仍按半年更換以均勞

下江監法司卷之二
逸

一浮梁縣東港鯉魚橋水陸兩卡應建卡房並由營統率以專責成也查東港水卡爲北河水路侵入之源又鯉魚橋陸卡距安徽婺源縣之樟樹亭五里場係扼要之區東港卡向委該縣縣丞帶領鹽快十名浮梁營都司帶兵五十名卡商二名鹽快六名巡丁十五名水手五名巡緝鯉魚橋卡向係九江鎮委弁一員帶兵三十名巡緝東港原建卡房被水衝塌鯉魚橋原未建設卡房弁兵向駐縣城應於該兩處修建卡房該縣丞有本任應辦公事不能常駐在卡應由省改委勤幹佐貳一

員招募鹽快十名其原委浮梁營都司帶兵五十名亦改由臣周之琦揀派按半年更換仍飭淨梁營就近選派所屬武弁一員帶兵三十名交給省委武員統率督查以專責成並令將東港卡商二名內派撥一名帶同鹽快五名巡丁十名一併在鯉魚橋一帶梭織遊巡以杜陸路偷越至馬鞍山卡在鯉魚橋下五十里僅距景德鎮五里該卡原設卡商二名鹽快五名巡丁十名本不得力應請裁汰

一湧山章周二卡應分別移撤巡緝也查樂平縣湧山陸卡浙私係從安徽婺源縣分管之周坑侵越而來路

徑叢雜此拏彼竄入鄱陽縣章田水卡相距郡城甚遠
支河汊港到處可通均屬無益惟太陽埠地方爲水路
要道應將湧山卡商一名鹽快一名巡丁一名水手一
名一併裁汰

一鄱陽縣黃龍廟卡應設巡船以資遊緝也查黃廟卡
專委饒州營千總二名又卡商二名鹽快一名巡丁二
十名水手二名巡緝該卡附近饒郡爲南北兩河總匯
之區上游之香屯東港等卡儻有疏漏必須下游堵截
應設立巡船二隻添募水手四名飭該千總帶兵二十
名卡商二名巡丁二十名輪班分駕巡船由饒州郡城

起南河上至壩口卡止北河上至太陽埠止常川往來梭織遊巡確探私梟蹤迹併力截拏不得株守一處致有疏漏

一餘干縣瑞洪卡宜添設卡兵設立巡船以資堵緝也查瑞洪地方係江浙兩省往來必由水路貴溪及安徽省婺源祁門三路浙私直侵饒郡且及省岸之南昌進賢並撫州府屬之東鄉臨川等縣實爲下游緝私扼要之區原設卡所委該縣縣丞督同卡商一名鹽快二名巡丁四名水手二名不敷巡緝應飭造船四隻飭令該縣丞添募水手六名巡丁十六名派委饒州守千一員

帶兵三十名會同分駕巡船常川梭織巡查以免疏縱
一運省漕駁船隻夾帶私鹽宜立法稽查以免闖越也
查廣信府各縣例食浙鹽每年漕糧運省每多夾帶私
鹽嗣後應令鹽道會同糧道出示河干曉諭並通飭廣
信撫州建昌三府屬有漕各縣於漕未起時嚴諭押船
丁役毋許船戶夾帶私鹽一面移知督解縣丞實力查
禁彈壓船隻經過卡所聽候查驗放行敢有闖越情事
卽將押運差丁人役從重治罪知縣解官一併參處以
示懲儆

一嚴定功過賞罰以示勸懲也查卡員並不認真緝捕

州縣相率因循應按季查明銷數較往年能有起色或
獲私較多將各員弁量予記功儻銷數無起色或獲私
較少將各員弁記過俟年終核明通年實在溢銷缺銷
分數將各卡員弁據實咨部分別議敘記過多者酌予
查參各緣由於籌定堵緝粵私章程案內奏准在案今
饒州府屬各卡員及地方官自應一律辦理奉

硃批其相努力務收實效仍須隨時認真稽查奉行不力者必
當懲辦不可姑息欽此

謹按以上西岸籌堵浙私

道光十三年五月鹽政陶澍江西巡撫周之琦會奏查江

西建昌府屬之南豐新城廣昌瀘溪四縣與閩省之建甯光澤泰甯邵武甯化等縣毗連閩私向由建昌府屬蔓延入撫州府屬建郡設有官店減價敵私撫郡歷無官店水販稀少鄉民每多藉口食私見已諭飭司道督飭岸商招募殷戶運鹽前赴撫郡開設子店並行各州縣廣招水販就近赴郡領買分售以便民食仍於撫建二郡原設各卡有今昔情形不同之處擇其扼要分別添設卡巡改委裁移據兩江候補知府陳煦會同署撫州府事瑞州府銅鼓營同知張玕署建昌府事贛州府通判王友沂逐一查勘定擬章程經鹽法道余正煥署藩

司桂良臬司程懷璟會同條議具詳前來臣等詳加考核所議均皆允當

一撫郡金谿縣原設石門卡應請分設兩卡原未建造卡房其巡船二隻見已損壞雇用民船該卡向委撫州營都司帶千總一員兵丁六十名自石門至下游許灣及臨川之黃港口計程八十餘里並無文員協緝該都司原有本營差操責令終年緝私恐致曠誤營務且往返遙遠亦屬鞭長莫及請於適中之許灣地方建造卡房由九江鎮派委隔屬守千一員帶領兵丁並於撫州營就近派撥弁兵六十名由省派委佐雜一員帶家丁

二名會縣招募巡丁二十名駐卡巡緝置備巡船四隻
水手十二名分赴上游文昌橋巡查仍令該駐卡文武
員弁督率兵役於附近各處出沒之陸路清源廟黃獅
渡琅琚五里川劉坊王坊等處密探私蹤隨時查拏不
得株守水卡致滋疏縱其私鹽均由東岸金谿縣境侵
入西岸臨川縣境責令該二縣嚴禁沿河渡口毋許渡
私仍按年取具渡夫切結如有違犯一併究處至臨川
縣之黃港口乃閩私透漏下游要隘應行建造卡房派
委文武駐緝將杉關卡原設兵丁六十八名內裁減十
八名宜黃樂安交界之接濟亭原設兵丁三十名內裁

減十名由九江鎮派委千把一員帶兵丁並在就近撫
州營撥兵二十八名由省派委佐雜一員帶家丁二名
會縣招募巡丁十六名水手六名置備巡船二隻東至
文昌橋西至上頓渡梭織巡緝如有梟販水陸統卡一
併嚴拏

一建郡南城縣之硝石萬年橋應請分爲兩卡改委專
駐以專責成也查萬年橋卡原建卡房久經坍塌嗣議
以硝石卡兼巡萬年橋該兩處均未建造卡房巡船二
隻見已損壞雇用民船向委建昌營千總帶兵五十名
會同南城縣丞帶鹽快十名巡役五名會督卡商巡丁

由硝石至萬年橋一帶按半月一次上下巡緝該員弁等均有本任事務責令兼巡河道六十餘里勢難兼顧應請硝石建造卡房置備巡船三隻由九江鎮派委隔屬守千一員隨帶本營兵丁並在就近建昌營選撥兵丁五十名由省派委佐雜一員帶家丁二名會縣招募巡丁連南城縣縣丞原設鹽快巡役其二十名水手九名均駐硝石卡會同巡緝仍責令該卡員弁等在於附近陸路私鹽出沒之轉江橋硝石黃饒園雙岡口三江口廠十里山鍾家礮蔡家邊大源塔山背楊家坊等處密探查拏不得株守水卡致有疏漏其萬年橋地方爲

閩私由新城南豐兩路下注之處從此水陸分途蔓入
臨川金谿等縣實爲要隘應請建造卡房置備巡船二
隻將瀘溪縣柳溪卡原設兵丁四十名裁減十名廣昌
縣等竹墟卡原設兵丁二十名內減十名另增兵十名
其兵三十名由九江鎮派委隔屬守千一員隨帶本營
並在就近建昌營選撥兵三十名由省派委佐雜一員
帶家丁二名會縣招募巡丁十六名水手六名分派巡
船會同堵緝並與硝石卡文武員弁每月定期會哨梭
巡如有繞卡陸行卽密探私蹤一併查拏不得株守一
處以免透漏

一新城縣盧家嶺卡並南豐縣百丈嶺卡均應增設鹽快也查盧家嶺與閩省交界原派佐雜一員鹽快十名分駐該卡未免單弱應請加增鹽快十名責令協同杉關卡武弁同督兵役查緝又百丈嶺卡亦與閩省交界向止佐雜一員鹽快十名不敷巡緝應請加增鹽快十名責令協同堵巡及該縣各卡文武員弁均於附近私鹽出沒處所周歷巡緝不得株守一處以絕梟蹤

一南豐縣盤湖等卡緝私文員應請改歸建昌府同知與南豐縣丞輪流接緝以均勞逸也查南豐盤湖等卡係閩私入境之區原委武弁一員帶兵三十名文職委

建昌府同通帶巡役二十名駐卡會同梭織查緝今應循其舊惟該府通判業已裁撤僅止同知一員而本任有應辦事件未便責令終年在外緝私致滋曠誤應請改歸同知與南豐縣縣丞輪緝按半年期滿更換以均勞逸奉

旨依議欽此

謹按以上西岸籌堵閩私

道光十四年二月海分司童濂稟查臨興場臨浦地方爲富安等處過海總匯必由之路從前綱運富安等處之鹽全係臨浦交付是以將富安局裁撤歸併臨浦以省

糜費惟是富安地面遼闊透私旱路甚多距富安西北
隅二十五里爲狼墩莊係富安小防半路灘旱私必由
之路其地最爲扼要又查狼墩莊東北十五里地名墩
上屬贛榆縣地界在富安正北三十五里距贛榆縣西
南五十里西北與山東郯城縣接壤西南由沭陽縣之
北鄉直接邳徐凡富安半路灘小防東關所透私鹽大
半由墩上經過其地一帶平洋岔路甚多時有梟匪囤
聚兼有外來倂匪比之狼墩莊尤爲扼要應請添設委
員駐劄墩上以資堵緝經鹽政陶澍批如詳辦理

謹按此係淮北行票請於贛榆縣墩上地方設卡緝

私

道光十五年二月委員謝元淮分司童濂稟前因王營西壩等處有以舊票重運私鹽之弊必應查辦當經卑職元淮等周歷巡查行抵王營會同該汛外委候補把總胡培帶同清河縣差役王營地保將西壩棧鹽逐堆查驗計二十二棧共堆鹽十六萬八千七百八十八包均屬鹽票相符惟有唐復興棧內無票私鹽二百五十九包又查私販龔玉林得信避匿據車頭王有功交出龔玉林之夥周廣銀搜出十四年八月青口舊票四張當交地保看管旋復逃走顯係舊票重販見將鹽包封存

移交清河縣究辦復又至順清河查驗湖船各包計一萬九千五百二十包亦屬鹽票符合伏查淮北票鹽暢行商竈均沾樂利惟利之所在弊亦隨之而影射透私尤爲票法之害必須隨時設法清理以期鹺務整肅除場下另籌巡緝收買私鹽外其西壩順清河二處爲票鹽總匯渡黃入湖之要區前議設官西壩專司掣驗卑職等再四熟籌以爲設官不如添派委員蓋移駐監掣大員則官職較尊商情隔絕書役人多易致於中舞弊委員則勢分親切商情易達且每年更換不暇爲營私久踞之計所設差役無多易於箝制去歲卑職等在揚

親奉面諭引票在場必須截角因未奉明文尙未照辦
以今日情形而論亟應遵照辦理方可剷除弊端後
民販請票應仿照淮南皮票截角之法在場下局員掣
驗時截去平聲第一角卡員抽驗時截去上聲第二角
在西壩添委一員駐劄於票鹽進棧時驗票截去去聲
第三角又於順清河添委一員駐劄於票鹽過壩上船
時驗票截去入聲第四角似此層層稽察則截去四角
之票不能復回西壩截去三角兩角之票不能復回卡
外場下而還票重運之弊除矣其委員每員差役四名
書辦一名卽已足供使令從前安東鹽河一帶原有護

送委員二人此次添設薪水亦不致格外多費卑職元
淮等於初到西壩時據各票商紛紛面稟咸言票不截
角官私難分當將西壩各商引票彙齊共四千四百十
六張截去第三角訖又將順清河各票計五百五十一
張截去第四角訖一面信知卑職濂等卽飭局卡各員
一體照辦先就場下委員前來接辦驗票截角等事務
使票法肅清私販杜絕經鹽政陶澍批據稟驗票截角
於稽查章程自更周密仰卽會同局卡委員認真稽查
以杜影射除出示曉諭外並候檄行鹽運司查明西壩
順清河地方應否另委委員駐劄稽查具詳核辦仍候

通行淮北行票各州縣一體遵照

謹按此係淮北行票請於清河縣王家營及順清河
地方添設委員驗票截角

道光十五年四月委員謝元淮分司童濂詳海屬三場本
年票鹽遵照定章歸局發販場價畫一擡價居奇之弊
業經除淨惟近日私鹽甚多卑職等訪聞俱由沈陽一
帶陸運直抵西壩卽在彼收買舊票往還藉作透私護
符必當嚴加緝捕方能票引暢行向來兵役拏獲私鹽
解交功垣隨時飭令局商稱收堆儲人鹽並獲者六錢
鹽價全行充賞有鹽無犯者減半給賞祇以解送道遠

車力艱難交鹽候價或稽時日是以報獲寥寥卑職等再四籌思惟有廣緝多收隨處交垣庶使人自爲利截私歸公較爲便捷有益謹擬收私章程五條 一凡遇私鹽出場無論車船馱挑不拘軍民販竈人等俱准一體查拏獲鹽之後卽將所獲鹽斤於就近包垣內按稱交收每淨鹽一斤給大錢二文亦歸拏獲之人得受其錢卽由垣商墊發彙報補領 一包垣收買私鹽隨時報明場官局員給價如垣商不願領價其鹽卽作爲商鹽聽其應販惟須憑官派販不得自行捆運藉收功鹽爲名致啟影射夾私之弊又開鹽不歸局之端卽官局

收買亦必按引派販不許自運有礙歸局之法 一通
行出示三場各局凡各鹽包垣池丁遇有私鹽交垣隨
時稱收給價不許抑勒短價亦不許加價爭收及故捐
不收 一前定章程拏獲功鹽請運者將應納經費豁
免原以鼓勵緝私員役而藉名功鹽希圖免費者亦所
不免此次收買私鹽一遇私販奪鹽過手卽同己鹽交
垣得價已屬優厚毋庸另籌體恤垣商收私每引鹽價
大錢八百文發販紋銀九錢照價一四合算每引計有
盈餘四百文亦屬有利至票販奉派捆運與垣鹽無異
所有錢糧經費應照新章全納不得短少以歸畫一

一灘垣多係客池筐價較昂西海收鹽成本亦重所收買私鹽每斤定價二文最爲公允至於東海各曠本池筐價本少昔按每斤二文收買誠恐刁竈牟利且以曬埽池鹽充私射利轉累池丁自應酌量核減所有海垣本池獲私交垣者每淨鹽十斤給與大錢十二文按斤計算不得援照灘垣之例以示區別經鹽政陶澍批據詳海屬三場票鹽酌擬收私章程本部堂細加察核如所稱拏獲私鹽於所在地方就近交垣稱收給價池丁墊發彙報補領等情自屬可行惟拏獲時仍應知會該管局卡各員隨時稟報以備查對其餘所議私鹽交垣

憑官派販應完錢糧經費照章全納並灘池西海二處
收買私鹽減價給賞各條是否不致流弊仍須斟酌盡
善方可永遠遵守飭司行令另行妥議詳候核飭遵照
其無犯私鹽自應如所議照舊減半給賞以防弊端

道光十八年分司董濂稟本年淮北票運江運引鹽共請
運五十一萬四千二百八十五引均於八月十五日前
全數到壩商販相安較之往年實爲順速惟票鹽暢銷
全賴緝私認真私鹽淨盡則官鹽暢行茲訪聞東路蒿
子頭黑魚蕩埭子口響水口一帶有等不法匪徒在該
處收買私鹽由海轉尖繞越大伊山卡直達武障河搬

運新安鎮堆儲俟雙金開放鹽河有水票運暢行之
際冒充票販船隻夾雜其中官私莫辨實爲票法之害
其額設汛弁駐劄龍溝相距甚遠難以兼顧今相度情
形武障河地方係東路出私要隘必須委員駐劄巡緝
方免透漏惟見在場下委員支銷經費有定未便額外
添設致滋糜費查薺薇河卡員向由房山卡移設該處
稱掣西路票鹽嗣於道光十五年內經前署運判謝令
稟請停止陸運票鹽全由板浦鹽河運行薺薇河卡並
不驗放船隻僅止專事巡緝而地與海州西門相近見
有汛兵駐劄又與吳家集卡相連是該卡可以不設應

請將薺薇河卡移駐武障河地方常川坐船巡緝堵截東路一帶出私要隘則巡緝足資得力所需巡船請於大伊山卡額設巡船二隻之內酌撥一隻毋庸另行添設至於武障河地方兩岸河灘並無民舍該卡員雖有巡船並無棲住之所應請仿照前建薺薇河卡之例於經費內動支銀二百九十兩於武障河附近地方建設卡房以資辦公經鹽政陶澍批允

謹按以上皆淮北緝私

咸豐三年九月鹽政怡良奏請於如皋之許家壩泰州之滕家壩江都之白塔河設卡稽查如不赴卡蓋鈐徑自

出江者卽以私論每卡設委員一人其書役稱手鉤損人等均由泰壩撥給又改道通行如有赴淮南引地楚西安蘇各岸銷售者經過南岸浙引地方不准私自售賣違者卽以私論

互見就場徵課

咸豐九年三月鹽政何桂清奏淮南鹽務自咸豐三年就場徵課無人請運繼改設局抽稅自七年力圖整頓收數稍有起色惟運銷僅有東壩一線生路鹽務以緝私爲第一要著設局之始卽經委勘二十場出入道路扼要設巡並有鹽捕營都司督飭千把等弁周歷稽查然設卡緝私尙係遏私之流而非淨私之源竈產鹽斤全

賴商收商不收鹽竈戶餬口無資狡黠者任意透私懦弱者束手待弊惟有廣招場商多備貨本源源收買如果鹽盡歸垣偷漏自少見已於泰州丁堰分別設棧令場商將垣鹽運棧發販不准販戶下場以期杜絕場私

互見
總棧

謹按以上淮南緝私

兩淮鹽法志卷六十一

兩淮鹽法志卷六十二

轉運門

緝私四

同治二年七月運司郭嵩燾詳官引之滯悉由私鹽之充然私梟橫行必先有窩囤包庇擬派鹽捕營員弁先就附近鄉鎮訪明窩囤將其家屬管押責令訪獲相通之窩囤准其自效免罪庶互相攻詰可以漸次肅清互見督銷門

同治二年九月鹽政曾國藩釐定淮南新章西岸皖岸三處截角查私楚岸四處截角查私如有包外夾帶私鹽

無論本商及船戶水手均照販私例治罪查出重斤照全船包數扣算將鹽充公如無護照及未經按卡截角者一概不准過卡

互見票法新章

同治二年十一月皖岸招商局候補道劉履祥稟金柱關以上大通以下無票之私鹽到處停泊應請示限截止請札飭各州縣一律緝私經鹽政曾國藩批無票之私及江甯民鹽各營食鹽前經頒示嚴禁應卽日截止由該局派委可靠之員沿江巡緝

同治三年十月鹽政曾國藩札海分司照得鹽法首重緝私淮北向設總巡及周莊武障河吳家集等處緝私委

員日久因循各卡幾同虛設札行該分司即便遵照查明何卡應留何卡應撤又楊莊地方尤爲私鹽繞越最要之區應如何設法堵巡之處刻日妥議章程稟覆察辦經分司沈炳稟查淮北舊設卡巡星羅棋布近年營委下場句串私梟大夥興販上年卑職蒞任後卽派委員前往板中臨三場及伊山一帶巡緝又委員駐劄新關龍溝等處查驗票船艙單以杜私船影射疊據報獲私鹽並飭局卡各員嚴緝重斤均經先後稟明在案刻下東路鹽河一帶梟風漸息卑職到任時壩價每包五錢今已長至一兩內外未始非各員嚴緝之效惟西路

臨興場所轄之臨浦青口二局鹽色最次路途較遠又因河道淤阻多年無販認運見在趕挑西河設法運銷查西路僅設吳家集一卡走私陸路尙多海州西門尤爲西路走私要隘查淮北總巡暨淮海緝私兩差向無駐劄處所擬請以淮北總巡移駐海州西門淮海緝私移駐楊莊查緝較爲周密又臨興場大使因小河口衙署多年坍塌廢厯任久寓板浦距本境相隔五十里場務難免廢弛見當改辦新章擬飭駐劄該場境內之富安鹽地方以期就近經理再各卡差役無多設遇大夥私梟不足以資堵緝應請酌定勇數由卑職自行招募隨

時派員周歷梭巡以收實效經鹽政曾國藩批查淮北
總巡暨淮海緝私兩員向無駐巡地段茲據查明海州
西門爲西路走私之要隘擬請以淮北總巡移駐該處
淮海緝私移駐楊莊尙屬周妥准卽照辦所請酌定勇
數查淮北各卡額設總散巡役多則十二名少則八名
本有舊章可循乃近來卡員並不駐卡辦公巡役更有
名無實仰卽通飭各卡員務須親駐卡所仍照舊額雇
募精壯充當巡勇遇零私則各自專緝遇大夥則合力
會拏一面嚴加考核各委員如敢仍前怠玩安坐私寓
虛糜經費無私報獲立即稟撤不得視爲常年例差稍

涉徇庇本部堂亦卽派礮船前往協查也

同治四年九月署鹽政李鴻章札據大通招商局魏道稟
水陸釐金局卡與皖鹽分銷局稽查卡原屬並行不悖
自宜飭其相爲聯絡牽制庶幾弊端日除釐金日旺乃
釐卡祇顧抽釐不問鹽之官私委員祇知查貨不問鹽
之有無司事祇知核算不察勇之賣放是有得於貨釐
而有失於鹽引矣至兼查私鹽亦各局卡分內之事卒
未聞有緝獲私鹽按月解繳大通總局者豈釐卡無私
可緝抑有緝獲私鹽應行人已耶請札飭牙釐總局轉
飭全省各釐局嗣後緝獲私鹽按月報解大通總局彙

報發售以二成變價給該局充賞等情合卽札行安徽
牙釐局轉飭沿江府州縣各釐局勿再顯預徇縱大干
參咎

同治八年十二月湖北督銷局候補道程恒生申據樊城
分局候補運判相恩祚稟稱案照小江口卡前經稟奉
暫飭樊城緝私委員候補從九劉樹仁接辦今親赴老
河口一帶察看情形當與水師健捷副營周統領面議
該卡自設立以來久無私鹽經過實由駐防礮哨盤查
嚴密之力擬將該卡卽行裁撤所有卡所旗幟虎頭牌
動用物件等項移交周統領添派礮哨照常設立查緝

應須房租油燭紙張划船等項擬由局每月酌貼公費錢三十千文以資巡緝再查均光鄭一帶潞私入境除營卡堵緝外汎弁衙役及民間亦時有弋獲就地散賣其流弊相等今擬無論軍民人等拏獲之鹽總報周營墊賞彙解其鄖陽老河口兩卡功鹽亦請就近總歸周營轉解來局庶於查緝報解均昭慎重等情理合轉報查核

同治九年四月湖南督銷局候補道唐樹森稟湖南一省之大向爲淮銷最暢之岸今則儘力疏銷而每年不及八萬引惟七年銷至九萬引良以淮引之滯銷皆由於

鄰私之侵占川鹽來路以宜昌爲門戶鄂省不停收川
釐則岳常澧一帶均爲川私浸灌粵鹽來路以郴宜爲
扼要湘省不停收粵釐則上而永寶下而衡州均爲粵
私浸灌鄰釐爲軍餉所關既不能明申緝私之禁水陸
之歧途百出又未能密爲設卡之防職道體察情形亟
思整頓無如時勢所值窒礙甚多欲爲經久之圖萬無
兩全之策又如辰岸專運碱鹽並於蘆衣汛設卡原爲
行銷辰州以上藉以廣銷路而敵川私乃近據常岸商
人稟稱碱鹽質味甚低並不能與川私相敵自蘆衣汛
設卡後辰常兩岸畛域判分碱鹽仍未暢銷而常岸之

鹽顆粒不到川私乃得鼓暢其中坐享漁人之利此又當設法調停早思變計者也茲將近日籌辦大概情形縷列四條 一私鹽來路各要隘應添置巡船飭淮商公局將所收緝私公費存款撥爲造船之用如有不敷再由本處籌款支發至添募巡丁應由卑局遴派委紳並飭淮商局選派商夥隨同稽查以資得力 一益陽之西林港爲靖江門戶常德之滄港爲益陽門戶布袋口等處又爲岳常交界地面均可設卡稽查以防私鹽偷越惟岳常澧三屬皆是水鄉去年下游瀕湖口岸被災甚重至今難民絡繹地方甚屬荒涼今議添設分卡

必須多派巡勇分途密布方足以壯聲威 一粵私由
郴宜闖入途逕分歧肩挑負販到處皆然極爲狡悍其
由水路盤運者往往溢出衡州大河旣經釐局抽釐卽
便順流直下任其所以故石灣暨東耒兩卡巡查旣
難扼要收稅均屬無多况見奉湖南撫憲奏明郴宜等
處照常抽釐濟餉卑局前詳請撥水陸營勇護卡會巡
亦奉湖南撫憲批駁所有衡岸移卡緝私事宜仍應從
緩商辦 一查辰岸碱鹽自七年九月開局起至本年
二月止據報共祇銷鹽二千五百餘引是辰岸試辦之
二十四票鹽銷竣殊難計日卽蔴衣狀設卡後辰銷仍

無起色而常岸往年曾銷過三十七票有零自易道詳定辰岸運碱之後去年僅銷鹽一萬一千一百餘引本年正二兩月僅止銷鹽四百十九引推求其故蓋因辰州油木兩項運銷常岸皆以價易鹽而返今常引不准越巖衣狀寸步以致銷數頓減如碱鹽足以敵川行銷極暢則通盤核算猶可截長補短乃碱鹽質味過低居民不願買食常引既經截止川私轉得暢行而常德幾成廢岸矣再該卡於上年十一月初四日開辦前飭承辦卡員王光輝將辦理情形稟覆至今未據覆到是以尙未轉詳近又訪聞該卡私造礮船製備軍火亦未據

稟報有案見經會同陸道白道札飭查辦經鹽政馬新貽批允

同治九年五月長江水師湖北漢陽總兵許朝琳呈報前准湖北督銷局會同湖北鹽巡道稟覆漢鎮巡鹽師船擬於季換之中查有巡緝出力者分別留換具報查攷但更換之期總以一年爲率以示限制業奉批准在案本年三月據署漢陽營中軍遊擊王正枝詳稱竊卑營原派巡鹽之左哨一號舢板一隻左哨四號舢板一隻前哨一號舢板一隻共舢板三隻於上年四月內分派前往湖北督銷局巡緝私鹽見已期滿遵照定章一律

更換因將更換巡鹽師船哨弁銜名呈報鹽政查核

同治九年十月署鹽政魁玉奏竊鹽務首重疏銷而疏銷

莫要緝私江蘇淮揚兩府逼近場竈凡產鹽之區鹽價

極賤每值鄉試年分私販恃考生爲護符考生帶私鹽

以漁利互相勾結積習已深官銷大受其害本年文闈

之前經前督臣馬新貽出示嚴禁七月二十前後正值

鄉試船隻連橋開江之際前督臣因傷出缺各考船乘

機興販肆無忌憚或一船帶鹽七八百包或一人攬船

一二十號明目張膽沿街灑賣上元江甯食岸官鹽片

引不銷而上江之考生又或與下江交易紙張磁器販

貨而來易鹽而去文闡考私充斥已甚瞬屆武闡勢更強橫若非力加整頓必致上侵楚西釐課盡成無著奴才當飭署兩淮運司龐際雲選派委員在於出場要隘孔家涵地方實力扼堵經該運司派委鹽捕營都司曾德麟候補鹽運判白璧管帶礮船並撥旱勇百名前往該處駐劄並由奴才刊刷告示頒發各場嚴申禁令疊接龐際雲具稟九月初四初五等日卽有武生吉至平湯俊良吉殿邦等不服盤查放箭闖卡經曾德麟率勇登船將私鹽投棄水中該武生等始尙知懼卽向江都縣求請給價迨十一十二等日考船愈聚愈眾船內無

不帶鹽滿裝重載結隊橫行經會德麟稟明後傳知該
考生給價收鹽令其先行挂號不料內有鹽城武生仇
茂森混名仇闖王竟敢鳴鑼倡首拒捕因時值順風欲
將涵口礮船衝開以便揚帆直闖該考生等張弓搭箭
滿布河岸各船戶約千餘人亦搬運瓦石任意拋擲維
時候補運判白璧協同旱隊嚴防繞越都司曾德麟督
率礮船竭力守禦不得已開放空礮乃武生仇茂森吉
殿邦等率眾前進竟不稍卻以致哨弁李永慶頭受重
傷船勇受箭石傷者不一而足該武生中亦傷死一人
方肯暫退次日查詢始知上日傷死者卽係倡首之仇

茂森查該武生向不安分並無自買之鹽專事包攬往返已非一次見復帶領大鹽船四隻倡率滋鬧聚眾拒捕伊父仇文傑亦係私梟爲裏下河所共知此亦天網不漏之明證等語奴才以該考生等如此蠻橫深恐激成巨案一面照會駐防揚州之記名提督吳長慶就近調撥隊伍馳往彈壓一面批飭運司速籌巨款給價收鹽十三日以後該考生等或多方把持不肯交鹽或通貼傳單希圖煽惑經龐際雲會同吳長慶添派員弁愷切開導酌定每鹽一斤給價十文按船稱收並將疊次逞凶抗拒之犯拏獲數人始漸貼服其繞赴三江營考

船百餘號亦經照會瓜州總鎮吳家榜派弁兵堵絕亦復折回孔家涵一律收買據龐際雲稟報截至二十七日已收鹽四五百萬斤放過空船八九百號均尙安靜查江南本省餉需及協濟陝甘各路軍餉以鹽釐爲大宗多一引私鹽卽占一引官鹽釐金短少則軍餉支絀此事關係大局不能不竭力維持此次武生興販私鹽船至千餘號鹽至數萬引之多實爲從來未有若堵禦不力則官引盡被占銷而辦理欠善則變端又多不測今於派兵扼絕之後寓恩於威籌款收鹽約需制錢十數萬串將來按照章程配引發販仍可收價歸款於公

項既無所損於銷路實有大裨惟該武生等藉考販私已屬不法尤敢恃強聚眾一再拒捕實屬罪無可貸除倡首拒捕之仇茂森例准格殺勿論外其餘吉殿邦湯俊良及續後拏獲之湯錦之陳炳人陳占魁等已飭運司逐細查明分別輕重按律懲辦以肅鹽紀而儆將來奉

上諭武生吉殿邦等分別輕重按律懲辦欽此

同治十年三月湖北督銷局候補道程桓生等稟燒包熬鹽有干例禁久經卑局派撥礮船查緝在案近來漢鎮一帶尙屬斂迹惟武昌省城外白沙洲一帶地方熬戶

內江縣志卷之二十二
一
尙多屢經拏獲到案訊究拆毀鍋竈並札飭江夏縣一體差查示禁乃該私販等終不免陽奉陰違推原其故特因一江之隔礮船不能常時往緝且近聞川鹽由金口而下亦漸侵及省垣亟應派員密查該員薪水每月擬給銀八兩夫二名銀六兩卽在川稅項下開支入於季報冊內造報經鹽政曾國藩批准照給

同治十一年正月江南鹽巡道孫衣言等詳案照瓜洲及泗源溝沙漫洲一帶爲私鹽叢集之區前奉派委黃軍門候補道楊鍾琛師榮光駐劄各該處巡緝疊獲功鹽多起私梟斂迹上江各岸銷市漸有起色惟經費支絀

不敷辦公見擬於瓜棧棧用項下每月撥給楊道銀二百兩師道黃軍門各五十兩以資辦公理合詳請示遵經鹽政曾國藩批允

謹按此項緝費前由金陵軍需局及岸商何公遠籌墊至是停止

同治十一年七月江南鹽巡道孫衣言詳督銷以緝私爲第一要務見在營船屢被懲辦頗知畏懼而差使船隻仍然不服盤查自下關委員辦理不善各卡望風而靡漸就鬆懈訪聞五月間湖口鹽卡卽有盤獲大員船隻夾帶多私之事其船係由下游各卡駛過何以沙漫洲

下關卡員毫無覺察其爲依違遷就已可概見至考生以鹽斤爲土儀藉賣鹽爲川資惡習已成轉瞬科場勢必有加無已尤須及早整頓惟有責成南北分司及各場官實力查緝竈私其淮揚一帶緝私各卡務令嚴禁江廣空船不得駛入裏河各港庶可稍杜私源經鹽政何璟批轉瞬科場尤須及早整頓擬令江廣空船不得駛入裏河係杜絕考私最要之策淮鹽出場斷難不脛而走鹽無船裝私自禁絕但僅責成緝私各卡不足以資彈壓來歲應由該道先期稟請選派文武大員酌帶礮船駐劄孔家涵等處要隘從嚴扼堵

同治十二年五月兩江總督李宗義奏兩淮鹽務引地未盡規復銷數本難充盈每屆鄉試年分因逼近場竈之地鹽價極賤一經裝運出江由江甯食岸以達皖省上至湖廣江西路程愈遠售價愈昂奸販謀利之心甚於畏法往往藉考販私積習已久上屆庚午科文武兩闈各考船結隊連檣乘機興販船至千餘號鹽至二十餘萬引之多以致江甯皖省各岸片引不銷短收課釐爲數甚鉅甚至武生聚眾拒捕經前兼署督臣魁玉奏奉

上諭嚴禁在案當經恭錄

諭旨通行曉示一面籌款將考船私鹽發價收買始得辦理安

貼本年又屆鄉試各該士子或託名土儀滿船裝載或臨場捐監藉此護符遇有關卡盤詰句串刁生出爲包庇小則肆口咆哮大則糾眾滋鬧種種弊端不勝枚指臣查兩淮課釐撥解部餉暨解直隸督臣李鴻章淮軍月餉陝甘督臣左宗棠前敵緊餉以及留發本省防勇軍餉出款浩繁多占一引之私卽少收一引之餉大局攸關不敢不實力整頓見已飭派文武大員酌調旱隊礮船在於私鹽出場要隘分劄扼堵仍刊發告示先期申禁嚴查各場煎鹽火伏不准溢額以清其源力堵外江裝鹽江船不准入口以絕其流事前布置周密庶臨

硃批知道了欽此

時不致掣肘臣惟有督飭運司暨各委員認真妥辦凡
考船查無私鹽立刻放行在卡兵役不得稍事留難儻
搜出鹽斤自當按律懲辦以肅鹽紀而保餉源奉

光緒元年三月皖岸督銷局候補道劉秉厚稟竊維皖岸
官引滯銷已非一日大約北岸患北私之侵盜南岸患
浙私之越銷食私侵灌於下游船私灑賣於江岸皆爲
皖引之大害節經嚴飭委員認真巡緝而各該員或以
地廣未遑兼顧或以勇單未便分巡屢有擇要布置之
請邇聞各私跌價搶銷較之官價貴賤懸殊梟徒漁利

販私曰侵曰廣若不亟籌堵截誠恐腹地受傷官引從茲大壞查巢無舒廬私蹤叢出惟巢湖侵入之私居多整頓北岸自應以堵遏湖私爲先策北私從合屬之石塘橋挑運而至巢屬之柘皋炯陽兩河口轉運過湖由湖路西侵舒廬則新河白石山馬圩河諸口爲從入之途南侵無爲則高林河口爲必由之路擬請酌撥礮船四號以兩號堵遏柘皋炯陽兩河口兼顧清溪旁侵要道以兩號堵遏新河馬圩河諸口時往白石山高林河巡緝分派得力之員管帶如無礮船可撥或由職局添造分劄私販當必畏威裹足矣此北岸之宜布置者也

甯太東境與浙食引地處處毘連湖汊支河縱橫如織
設卡專守一處斷難得力因地制宜度非分派礮船兩
號責成東壩蕪湖緝私委員於大小南河及三汊河唐
溝水陽一帶河道分頭巡緝則江高廣建之私未易杜
絕惟南岸止有東壩礮船一號專任緝私此外無可抽
調應乞撥給蕪湖緝私委員礮船一號會緝甯太水路
之私庶該員不致虛設卽東壩礮船亦免顧此失彼之
嫌此南岸之宜布置者也來安縣屬之古城集江浦縣
屬之烏江鎮江滁界之西閣城均爲走私要隘梟賊成
羣動逾數百斷非一二巡員所能躡緝據蕪湖局員候

補運判方克猷條議援照邳宿睢桃借撥成子河弁兵
會緝章程咨請江浦防軍酌撥弁兵分劄古城西閣烏
江各隘會哨梭巡職道愚見滁來一帶民風强悍如有
營兵巡防藉資彈壓似於地方鹽務均有裨益此下游
一帶之宜布置者也東西梁山爲下游入皖第一門戶
舊設委員分駐東西兩岸私船無從偷渡嗣以水流太
急不能停泊鹽船稟奉裁撤運商稱便而差船礮船夾
帶之私由此任意侵越沿江灑賣大礙官引查大興鹽
卡見駐廢岸不能得力擬請改設東梁並酌添巡船一
隻經費六兩西梁幫辦一名照舊分駐除鹽船外無論

何項船隻過卡會同釐卡一體嚴查原設下游礮船卽歸該卡統轄各委更番巡守兼顧當塗和含所屬各口岸以防后漏其大興緝務卽派合肥分銷局員就近兼管此江岸之宜布置者也查西岸緝私經費每引扣銀二錢鄂岸每引扣銀一錢五分商捐官辦皖岸情事相同可否援照鄂岸章程每引酌減扣銀一錢諭商捐辦見擬添設委員礮船一年約需經費銀四千數百兩以每引扣銀一錢計之足敷支應至地方官本有緝私之責第從前運商認岸文武衙門均有陋規而緝私經費亦取給焉自設局招商以來衙門之經費旣去責以鹽

務事多扞格而難行擬請嗣後解局功鹽如係衙門派撥兵役自行緝獲應以五成歸原衙門作爲緝私經費五成賞給兵役如係卡勇會同衙門兵役截拏應於五成內提出一半給原衙門經費一半充賞兵役五成歸局分別充公充賞其由釐局會緝及自行緝獲功鹽均請一律照辦惟皖岸局勇緝獲之私應照舊章辦理如蒙俯允卽請分別咨行長江巢湖水師安徽藩司及牙釐總局轉飭所屬一體遵照又皖岸南北兩綱六百票遞年歲銷本不足額兼之歷屆科場考私侵占而綱分更形積壓自癸酉科經前督鹽憲李定章廣收竈鹽派

隊扼要布劄而場竈售私透私之弊悉絕惟武闡時尙有考船夾帶食私上駛皖境亦屬有礙官引本年又逢科考亟應先事預防仰懇查照舊章飭商收買竈鹽派兵堵扼場私早爲頒發告示通行曉諭嚴禁船戶夾私考生包庇並飭沿江釐卡嚴密稽查以杜食私入皖之路庶岸銷可望有起色矣經鹽政劉坤一批皖岸地居中路四面皆受私侵該道力圖整頓酌議條款如南北兩岸擬添礮船北岸則堵巢河侵入之私南岸則緝甯太水路之私尙屬切要應准照辦惟省中留防水師各有專責無可抽調不能不另行添造照來稟所請應添

舳板五號約需造船經費若干將來薪糧等項每月每
船約須若干每年統計若干應再逐細估明開摺稟核
其船應否飭令船廠代釘並卽妥議稟覆旣欲添船須
先籌費據議仿照西鄂兩岸勸令皖商每引捐銀一錢
以作緝私之用亦屬可行滁來江浦一帶私蹤絡繹梟
勢尤橫據請轉飭江浦防軍分劄各隘會哨梭巡候卽
咨商吳軍門酌核辦理又解局功鹽姑照所議分成給
賞又本屆考私應照舊章認真扼堵惟東西梁山前次
本設有鹽卡旋經前局員袁道查明夾江水流太急不
能停船卡設山凹中亦無所覩竟屬虛設稟請裁撤有

案聞該處所設貨釐卡亦甚不便於商此議礙難准行
差船礮船之私應仍責成金陵下關鹽卡實力嚴查大
興集一卡既成廢棄並應裁撤以節經費

光緒元年七月鹽運司方濬頤呈醬板食醬均爲各岸鹽
分銷大宗豈容越境販賣前有奸商在揚州府屬就近
鹽場一帶購買私鹽躉入販運經皖鹽招商局魏道稟
奉前爵憲李札飭查禁不准運往上游等因奉經分飭
揚屬各州縣卡遵照嗣准江南鹽巡道咨以釐卡抽收
醬釐不復查禁請飭嚴切示禁詳奉前爵閣憲曾札飭
金陵蘇省兩釐局轉飭遵照咨司一體轉行各在案惟

揚屬地近場竈鹽醬價廉誠恐不肖奸民故智復萌或藉鄉試冒充夾帶分別移行查禁儻有上駛船隻夾帶醬板醬鹽卽行查獲解揚發店變價充公以保上游岸引

光緒二年二月皖岸督銷局候補道劉秉厚稟奉憲批飭定巡緝功過每年分上下半年考核以示勸懲等因查皖省各路私蹤情形不同講求承緝與考核功過亦難一致巢湖該處辦法在堵私不在獲私各委承緝功過應以北鹽銷數暢滯爲衡自上年秋間添派礮船各口巡查私販聞風斂迹核計北鹽銷數比前年多銷十有

五票未始非礮船堵扼之力見又擬撥船進扼西口要隘使私販不得出湖陸路則撥調滁來一卡移駐柘皋會同廬州府李守派員辦理北鹽銷數自可逐漸暢旺其功過擬請每於年終考核一次果能暢銷酌予獎敘如無起色分別記過撤差至皖北陸路暨皖南長江緝私各員所轄引地較廣均以梭巡爲職應以是否緝捕認真暨有無拏獲犯鹽并大夥窩囤分別定爲功過每年分上下半年考核兩次庶免虛應故事復查考核舊章拏獲大夥數至四千斤以上記功請獎三月以內未見緝獲私鹽卽記大過記過三次立即撤委似與憲定

章程相符此次緝員獲私多寡不等均尙能時有報解并無買私搪塞得賄縱放情弊除鄧永思一員業因辦事不合暫行撤差其餘緝私較多及北鹽多銷十有五票巢湖堵辦各委可否由局記功分別請獎以昭激勸之處乞示飭遵經鹽政沈葆楨批查鹽員考核功過有督銷之責者當以銷數之暢滯爲斷有承緝之責者必以緝私之多寡爲斷此理一定不易前因新設礮船無私報獲是以批令嚴定功過今核來摺祇敘文員獲私數目究竟各礮船哨弁曾否獲私未經敘及至考核旣分上下半年自應分析核算不能一年統計其與他卡

會獲考私亦不便歸入常年計考仰再查明各哨弁有無私鹽報獲及各文員何員應獎何員應懲悉心斟酌另詳核辦不得概請記功預存見好屬員之心也

光緒二年二月鹽政沈葆楨奏兩淮鹽課爲餉源所自出兩湖爲淮鹺最暢之岸近與川鹽分界行銷分川之界名雖川淮並行其實淮鹽已片引不到而分淮之界又被鄰私任意充斥各州縣督銷考成兵燹後久未舉行以隔省之員緝隔省之私呼應不靈積重難返查有湖北孝感縣知縣蔡炳榮獨能破除習見竭力疏銷該縣與淮北引界毗連北私最易潛侵民情又素强悍從前

月銷僅數十引至百餘引該令履任後認真整頓凡關涉鹽務案件從未積壓近則每月能銷四五百引或多至千引以外實屬異常出力又管帶礮船守備梁職本派赴鴨闌磯卡堵緝越界川私該弁貪刻任性玩視緝務未便稍事姑容據楚岸督銷總局湖北鹽法道蒯德標廣西補用道程桓生稟請分別勸懲前來合無仰懇天恩准將運同銜補用同知直隸州孝感縣知縣蔡炳榮俟補同知直隸州後以知府補用儘先守備梁職本卽予革職以資觀感而勵將來經部議准

光緒二年五月鹽政沈葆楨批沙漫洲緝私局候補道楊

鍾琛稟紅船夾私一案紅船船戶竟敢通同水手裝載私鹽經該道於途次訪獲稱至三千七百餘斤斷難稍從寬貸仰卽將該犯重責枷號並將私鹽船二隻封至卡前示眾一面押令交出船主飭縣照例訊辦自閏月初一日以後所獲私鹽務須將鹽立時拋水船隻鋸毀庶與揚州辦理一律鹽斤拋淨凡開卡搶鹽之弊不禁自絕矣

光緒三年四月五河鹽釐局候補道程國熙稟查清查沙基勒令剷除以清其源防堵要隘嚴拏場私以遏其流均爲目前至要之務見奉憲批責成海分司督率場卡

各員實力查禁自必遵照認真經理果能辦有成效實爲緝私之第一良法又奉憲批五河附近之私已會安徽撫部院派委管帶長淮水師吳總兵占元募勇百名於淮渦兩岸私梟出沒之處躡蹤搜捕其暗中透漏者以官票影射爲尤甚昨亦批令程道嚴加稽察不准以廢票朦混等因查吳總兵所招之勇刻已訓練成軍由北而南嚴緝窩頓並查拏大夥梟販如何情形容月隨時稟報外其附近各路私槽亦經職道查訪明確開單移送吳總兵次第查辦並先咨請鳳潁道壽春鎮通飭各州縣營汛先行查禁押令閉歇稟明在案再查清河

縣所轄之楊莊馬頭鎮陳家集等處均有大夥私槽如
能查拏淨盡則湖船無處買私亦正本清源之道又奉
憲臺鈔發該票販等原稟一件職道悉心查閱所言多
中竅要亦有一二與五卡大有關繫者如靈璧泗州等
岸久爲私鹽侵占俱由邳宿一帶陸路運往等語查泗
靈接壤邳宿所云私鹽侵占者其實不盡係私鹽實係
邳宿桃睢四岸官辦食鹽越境侵灌此次吳總兵帶勇
巡緝先由北路入手如遇前項越境鹽斤無論有票無
票職道在所必拏此不能不預爲陳明者也經鹽政沈
葆楨批允

光緒四年正月海分司于寶之稟奉札以洪湖營究係何
弁收受私費飭卽查明稟覆卑職訪得運河南岸有黃
家等圩開設私槽每私鹽一包共收私費五百六十文
內洪湖營得錢每包一百六十文係該營頭目周萬清
經收該都司鄒光前難保無知情情弊經鹽政沈葆楨
批洪湖營頭目周萬清收受私費該營都司何以毫無
覺察其爲知情縱容已可概見查該都司鄒光前見據
淮揚鎮稟請給咨赴都擬保儘先遊擊張垵署理月批
在案候札該鎮卽將該都司立予撤任先委遊擊張垵
暫行代理仍遵批查明該遊擊是否實無嗜好出結呈

覆並由該鎮確查鄒光前縱容周萬清收受黑費情弊
據實稟候分別參辦以昭炯戒

光緒四年十一月兩江總督沈葆楨批下關掣驗委員候
補知府顏培豫等稟下關掣驗卡爲淮鹽查私首要之
地無論何項船隻均應停候查驗此次煤鐵局所雇魚
眼大船兩號何以並未停泊候查雖經該卡派令礮船
追查尙無夾帶將來日久弊生難保不夾私漁利該守
等擬請飭由煤鐵局填給護票過卡呈驗摺查蓋戳放
行係爲杜絕流弊起見仰候札飭安徽煤鐵總局遵照
辦理如船戶不將護票送卡應卽扣留治以闖越之罪

如到局繳銷票內查無掣驗卡查訖戳記並由該總局稟請嚴懲以儆效尤

兩淮鹽法志卷六十二

轉運門 緝私四